

Oktoberimi Taseralimmit nutaarsiassat

Oktoberi pissanganartunik nuannersunillu kulturikkut misigisassanik neqeroorfippas-suaqassaaq.

- *Taseralimmi isiginaartitsinerit*

Macbeth, Shakespeare-p allataa

Tuluup isiginnaagassiortartorsuup William Shakespearip pissanganartuliaa Macbeth Silamiunit isiginnaartitsissutigineqartoq Taseralimmiisaaq oktoberip 7-anni. Nunatta isiginnaartitsisartuisa nuiamansaat Makka Kleist inuttaassalluni.

Alianartuliatut pissanganartutut Shakespeare-p isiginnaagassiarisartagaanut allanut naleqqiullugu Macbeth-imi Shakespeare inuup tarnimigut pissusaanut pulalluinnarsimavoq. Sakkutuut naalagarsuat iluatsitsilluinnarsimasoq naalagaarusunnersuarmut ataqqisaarusunnersuarmullu ussersartorsior-titaangarluni killormorluinnaq saappoq, nuliament immisulli piummartutigisumit itsarsuarlu ilisiitsumik siulittuisartumit kaammattorneqartuarluni. Naak oqaluttuaq 1040-mit 1047-imut pisimasuusaartin-neqaraluartoq, ullutsinni Macbeth-imut assingusorpassuarnik inoqarpoq. Kalaallisut oqaatsivut oqaluinnarluni torrallatat atorlugit itsarnitsat paasiuminartunngorlugit Makka Kleist-ip isiginnaagassiaq takutissavaa, Shakespeare-ip isiginnaagassiaqqaavata anersaava atatiinnarlugu oqaluttuariaatsikkut qullilersuinikkullu. Iserneq 80,- kr., utoqqalinersialinnut aamma ilinniartunut 50,- kr. 7.oktober, nal. 19.30.

Malugisarpara Pipaluup allataa

Silaannakkut angallannikkut akunnattoorneq peqqutaalluni Malugisarpara Taseralimmi takutinneqanngitsoorpoq. Tamanna uagut isiginnaartitsisussallu assut ajuusaarutigaarput. Maannali nutaamik isumaqatigiissuteqarpugut, Malugisarparalu takutinneqartussanngorpoq

oktoberip 18-ani aamma 19-ani. Sumiiffinni tamani Malugisarparap takutinneqarfiini isiginnaagassiaq nuannarineqarlunnarpoq. Isiginnaagassiortuuvooq Pipaluk Kreutzmann Jørgensen, 2001-03-mi Nørrebro teaterskole-mi atuarsimasoq. Taamanili takorluulersimavaa isiginnaartitsissummik kalaallisuumik allannissani, kulturikkut kingornutatsinnik ersarissaasumik. Isiginnaagassiamik ilisarititsinermini Pipaluk allappoq, isiginnaagassiami siunertarigini inuusuttut nammineq naleqassutsimik kalaaliussutsiminillu tulluusimaarutiginnin-nissaannik tunerusukkini. Malugisarpara nipilersukkat atorlugit pissanganartuliaavoq, inuusuttut marluk naapeqqaarnerannik oqaluttuarinnittoq, aamma imminnut qanilliniarlutik aqqusaartariaqagaannik. Isiginnaartitsisartut (ilinniarsimasuunngitsut) arfinillit peqataapput. Aggo Rosing Olsen, Connie Kristoffersen, Vilhelm Egede, Najattaajaraq Joelsen, Ane Marie Ottosen aamma Miki Thomsen. Pipaluup allataaraa ilitersuisuuffigalugulu. Isiginnaariartussallu qilanaarfigisinnaavaat isiginnaagassiaq nipilersornermik, assilisanik, filminik isiginnaartitsinermillu imaqarluartoq. Isiginnaagassiaq inuusuttunut suliaavoq – tassa meeqqanoortuunngilaq – taamaattumik isiginnaariarsinnaasut ukiuat 12-nut killilerneqarsimavoq. Pissanganassaqaq 18. aamma 19. oktober, nal. 20.00. Iserneq 60,- kr.

- *Eqqumiitsuliat Taseralimmi*

Kunngi – Timitalikkat

Eqqumiitsuliortoq aamma taallioortut erinarsuusiortatutullu naluneqanngilluartoq kunngi, Frederik Kristensen, nammineq suliaminik saqqummersitsissaaq Taseralimmi 17. oktoberimii. Kunngi eqqumiitsuliortutut tamatigoortutut ilisarimanearpoq qalipakkanik, pappiaqqanik qiortakkanik ukkusissanillu qiperukkanik suliaqartartutut.

Taseralimmilu saqqummersitassai akryl atorlugu qalipagaapput qulequtsersimasai "Timalikkat". Eqqumiitsuliortoq nammineq oqaluttuarpoq akryl atorlugu qalipaagaangami suleriaatsit assigiinngitsut marluk atortarini, tassa qalipakkat ilusaat ilisarnartut, imaluunniit ilisarnanngitsut, saqqummersitassanilu suleriaatsit taakku marluk iluiniissasut.

"Ilusaat ilisarnartunik qalipaagaangama qalipaait killilimmik amerlassusillit atortarpakka, ilisarnanngitsunilli qalipaagaangama killeqanngitsumik qalipaasersuisinnaasarpunga, imminut assut kiffaanngissuseqartillunga".

- Ullutsinni suut tamarmi sukkaqisumik ingerlaarlutik sanioqquavaatigut, isigisavullu sivilaartumik aalajagiussimasinnaasanngilavut. Taamaattumik pisariaqarpoq qalipakkanik itisileriffiginnaasatsinnik misissuataarsinnaasat-sinnillu isiginnaagassaqsinnaanerput, tassami tassangaannaq qalipakkami takusaqalersinnaagatta amerlasuuneq assigiinngitsorpassuarnik, kunngi oqaluttuarpoq.

Saqqummersitsinissamut atatillugu Taseraliup suliaritippai postkortit ataaseq 10,- kr-lerlugu pisarineqarsinnaasut, aamma plakati 50,- kr. Saqqummersitat tuniniagaapputtaaq. Kunngi - Timalikkat, 17. oktober – 9.november.

- *Nipilersornerit*

Alter Me & Angu

Soorlu amerlanerit nalunngikkaat Taseraliup inersuaa 256-inik issiaveqarpoq. Naak isersimasinnaasut nikkorfasut amerlanerulersinnaangaluartut issiaviit tulatsinnerisigut, nassuerutigisariaqarparput rock-imik tusarnaartitsinerit angisuut suli Timersortarfimmi ingerlanneqartuartariaqassammata. Rock-imik tusarnaartitsinerit inunnit 1000-it tungaannut peqataaffigineqarsinnaasut pikkunartumik pissarsiffiulluurtarput aamma aningaasatigut imminnut napatissinnaanerusalutik. Tamanna Sisimiunuinnaq atuutinngilaq, illoqarfinnulli allanut tamanut, soorlu

assersuutigalugu Nuummi tusarnaartitsinersuit Inussivimmi akuttunngitsumik ingerlanneqartartut. Tamannali oqaatigereerlugu aamma taarusupparput Timersortarfimmi tusarnaartitsisarnernik Taseralik pitsanngorsaaqataasinnaamat, aamma allaffissornikkut pilerisaarinik-kullu eqaannerusumik periarfissiussinnaalluni. Taamaattumik Taseralik aamma Sisimiut Tusaataat isumaqatigiissuteqarput siunissami annertuunik tusarnaartitsisoqassatillugu suleqatigiinnissaminnik. Tamannalu Timersortarfik klub-illu atuisartut qanimut suleqatigalugit ingerlanneqartassaaq.

Tusarnaartitsinissaq siulleq suleqatigiissutis-sarput Timersortarfimmi ingerlanneqartussaq 31. oktober pissaq, nipilersortalugit Alter Me aamma Angu Motzfeldt.

Angu immikkut annertunerusumik ilisarittariaqarunangilaq, ukiuni kingullerni nunatsinni Danmarkimilu tusaamaneqarlualersimangami.

Nipilersoqatigiit Alter Me cd-mik saqqummersitseqqaarnermik kingorna rockimik nipilersortarfimmi tamani nuannarineqaqalutik tusarnaartitsisalersimapput, kingullermik Aasiaat Rockfestivalimi. Nipilersoqatigiit pillugit siulittuutaavoq nunarsuatsinni tusaamasarsuanngoriaannaasut, tusagartuullu oqatigaat nuusior-tarfissuarmik EMI-mik (The Beatles-it nuusioqqaarfigisaannik) isumaqatigiissuteqarlersut. Pissanganassaqaq.

Nipilersoqatigiit taakku marluk Timersortarfimmi tusarnaarneqarsinnaapput 31. oktober, tamakkuninngalu nuannarisallit ulloq taanna ullorsiuutininni krydsilereersinnaavaat. Bilitsi 185,- kr. siumoortumik pisinerimi, isilernerimilu 200,- kr. Isssutissat Taseralimmi tuniniarneqarput.

Meeqqanut - Anda Uldum & Jan Hilmar

Meeqqat minnerit puigorneqassanngillat. Novemberip 4-ni aamma 5-ani meeqqerivimmiut atuartullu minnerit ukioq manna meeqqanut

tusarnaartitsinerit nuannernersaannut qilanaalereersinnaapput. Tamanna pissaaq Sisimiut Kommuniata Atlantic Music-illu aaqqissuussaannik "Meeqqanut" tusarnaartitsineq Taseralimmi ingerlanneqalerpat. Tusarnaartitsissapput Anda Uldum aamma Jan Hilmar. Nipilersornissat uterfigeqqissavavut nittartakkatsigut.

Nuannisarluarisi

Juaaka Lyberth
Pisortaq

- *Oqallinneq Taseralimmi*

Namminersorneq pillugu paasisitsiniaaneq oqallinnissarlu, novemberimi taasisitsissutigineqartussaq sioqqullugu, paasisitsiniaanerit ingerlanneqarput. Paasisitsiniaaneq Sisimiuni ingerlanneqassaaq ulluni sapaat 26. aamma ataasinngorneq 27. november.

Margrethe Nielsen "Ilaqutariinnut"

Tamannali sioqqullugu Margrethe Nielsen "ilaqutariinnut peqqissaaneq suua"-mik qulequtsiilluni oqalugiassaaq pingasunngornemi 8. oktober unnukkut, nal. 19.30. Aggialluarisi.

- *Taseralimmi Bio*

Pisarnertut Taseralik Bio filminik nuannersorpassuarnik pissanganartunillu oktoberip ingerlanerani takutitaqartassaaq. Sapaatip akunnerani 41-imi "The Forbidden Kingdom" isiginnaarneqarsinnaavoq. Allat aamma takkutissapput, soorlu Rejsen til Saturn, Disco Ormene, Wanted, Hellboy 2, The Love Guru, allarpasuillu. Eqqaamallugu filmernissat piffissaat ullut 18.-19. oktober Malugisarparaqartussaammat allannortilaaratsigit.

Tamakkua tamaasa malinnaaffigisinnaavatit nittartakkatsinni www.taseralik.gl –imi.